

# Ingenzi Initiative yahuriye hamwe abakinnyi ba Tennis mu rwego rwo kwizihiza Umunsi Mpuzamahanga w'Umugore

March 17, 2024

*Mu rwego rwo kwizihiza Umunsi Mpuzamahanga w'Umugore wizihizwa buri uko Umwaka utashye tariki ya 08 Werurwe, Ingenzi Initiative yateguye Irushanwa rya Tennis ryabereye ku Bibuga bya Kigali Tennis Ecology byubatswe muri IPRC-Kigali mu Karere ka Kicukiro.*

Mu rwego rwo kwifatanya mu kwizihiza uyu munsi, by'umwihariko mu gihe Igihugu kikiri mu Kwezi kwo kwizihiza uyu Munsi, Ingenzi Initiative yateguye Irushanwa yise "International Woman's Day Tennis Workshop and Competition", ryibariwe n'Abakinnyi 40 barimo ababigize Umwuga n'abatarabigize Umwuga.

Iri Rushanwa ryakinwe mu gihe cy'Iminsi 3, ryatangiyeye ku wa Gatatu tariki ya 15 Werurwe 2024, risozwa kuri iki Cyumweru tariki ya 17 Werurwe 2024.

Ryakinwe mu byiciro bitatu, birimo ikiciro cy'abakinnyi batabigize Umwuga, ababigize Umwuga ndetse n'ikiciro cy'abakinnyi bakina bafatanyije, Umugore n'Umugabo.

Abakinnyi batangiyeye bakina imikino y'amajonjora guhera ku wa Gatatu kugeza kuri iki Cyumweru habonetse abahize abandi.

Mu kiciro cy'ababigize Umwuga, iri Rushanwa ryegukanywe na Nishimwe Carine atsinze Tuyishime Sonia, amaseti 2-1 (6-4, 6-7, 10-5).

Nyuma yo kwegukana iri Rushanwa, Nishimwe Carine yagize ati: "Ntabwo nari niteze gutsinda Sonia, bitewe n'uko

ntaherukaga gukora Imyitozo ihagije”.

“Maze kumenya ko iri Rushanwa rihari, nabwiye Ababyeyi ko ngiye gukina Irushanwa ryo kwizihiza Umunsi Mpuzamahanga w’Umugore, banca intege ko ntacyo nzarikoramo, bitewe ko ntaherukaga imyitozo, ariko ndashima Imana ko naritwaye kandi iyi ntsinzi nyituye Ababyeyi bange”.

“Mu mukino hagati, Sonia yabanje kungora, ariko nza gushyiramo Imbaraga birangira mwigaranzuye”.

Agaruka kuri uyu munsi by’umwihariko n’icyo uvuze kuri Tennis y’abari n’abategarugoli, Nishimwe yagize ati:”Ndashimira Ingenzi Initiative yadushyiriyeho iri Rushanwa, by’umwihariko na Ndugu Philbert wabonye ko Umugore nawe ashoboye gukina Tennis”.

Yakomeje agira ati:”Ndasaba Ishyirahamwe rya Tennis mu Rwanda, gukomeza gukora ibishoboka byose ngo Tennis y’abari n’abategarugoli itere imbere kuko bigaragara ko hari urwego basaza bacu bafite tutarageraho”.

Mu gihe mu batarabigize Umwuga, iri Rushanwa ryegukanywe na Shyirambere Aimé Sabine atsinze Kate Nansiima Iseti y’amanota 6-3.

Mu kiciro cy’abakinnyi bakina bafatanyije, Ikipe ya Tuyishime Sonia wafatanyaga na Me. Kayiranga Cyrile, yatsinze iya Shyirambere Aimé Sabine wakinaga afatanyije na Kamanzi Fidel, amaseti 2-1 (6-1,6-1).

Mu izina ry’Ishyirahamwe rya Tennis mu Rwanda, Visi Perezida wa kabiri, Dr Mbabazi Jennipher, yashimiye Ingenzi Initiative yateguye iri Rushanwa ndetse yizeza ubufatanye hagamijwe kurishyira ku rwego rwisumbuyeho.

Ati:”Ishyirahamwe ryacu iteka riharanira icyateza imbere Umukino wa Tennis mu Rwanda”.

“Mu rwego rwo kurushaho guha Imbaraga iri Rushanwa, tuzaganira

n'abo dufatanyije, uburyo ryashyirwa ku ngengabihe y'Amarushanwa dutegura".

Yakomeje agira ati:"Turabizi ko umubare w'abagore bakina Tennis ukiri muke, bityo niyo mpamvu Umuntu wese ugaragaza ibikorwa biteze imbere Umugore muri Tennis, tugomba kumushyigikira".

Yitsa kuri uri Rushanwa by'umwihariko, Ndugu Philbert wariteguye, akaba ari n'Umuyobozi wa Ingenzi Initiative, aganira n'Itangazamakuru yagize ati:"Twe nka Ingenzi Initiative, twiyemeje gukora ibishoboka byose ngo Umugore atere imbere muri Siporo by'umwihariko Tennis".

"Impamvu twibanda kuri uyu mukino, ni uko igihe nari kiri Umuyobozi ushinzwe ibya Tekinike mu Ishyirahamwe ry'Umukino wa Tennis mu Rwanda, nabonaga ko iki Kiciro gikenewe gushyirwamo imbaraga".

Yasoje agira ati:"N'ubwo hari Intambwe tumaze gutera, ntabwo turagera aho twifuza. Turashimira abakomeye kutuba hafi muri uru Rugendo tumazemo Imyaka ibiri, ariko turifuza n'andi maboko yadufasha kugera ku ntego twiyemeje".

Twibutse ko, ubwo iri Rushanwa ryakinwaga ku nshuro ya mbere mu Mwaka ushize, ryegukanywe na Tuyishime Sonia, atsinze Mbaye Shema Annabelle, amaseti 2-0.

Ni ku nshuro ya mbere kandi yakinwe ikiciro cy'abakinnyi bakina Umugabo afatanyije n'Umugore, ibi bikaba bikorwa hagamijwe kwimakaza ihame ry'uburinganire n'ubwuzuzanye muri Siporo nk'uko byagarutsweho na Ndugu Philbert.

## **Amafoto**



